

欽定剿平粵匪方略

欽定剿平粵匪方略卷二百六十 辛酉年

二月十四日 壬申 瑞昌王有齡奏言上年十二月

開大股逆匪由桐廬竄踞富陽意圖東竄甯紹
內犯省垣時副將貴廷芳分防江面 臣將副將
楊金榜王振聲各軍調回防省派守備劉嘉玉
包文舉兩軍赴富歸貴廷芳調遣復以陸路兵
單並飭楊金榜帶隊前往會同貴廷芳水陸攻

勦迅圖克復二十三二十五等日疊次鏖戰斃
賊無數二十八九等日該逆堅守富陽城卡乘
閒駕駛竹箴出犯經我軍奮力迎勦賊不能支
我軍追至城下當斃賊目二名步賊數十名正
月初三四等日官軍水陸並進各礮船沿城攻
打又斃賊數十名其馬步賊匪出戰復經兵團
橫擊礮斃不可勝計初七日我軍四面環攻疊

戰竟日將西門賊營踏毀斃賊無算守備包文
舉布良帶等隨帶敢死之士潛伏東西兩門乘
夜爬城舉火爲號貴廷芳親率各路兵勇奮力
攻城蔣貴斌張椿等督率民團渡河助剿該逆
猝不及防均向北門紛竄貴廷芳等斬關直入
斃賊甚多卽於初八日將富陽縣城克復各隊
跟蹤追剿至四十餘里始行收隊惟新城賊踞

如故富桐地面均有賊蹤不可不防回竄仍飭
各軍分投追剿並令各礮船沿江堵扼以期迅
掃賊氛署富陽縣知縣蔣貴斌典史張椿集團
助剿頗爲得力該員等應得失守處分可否

加恩免議之處恭候

欽定奏入

上諭內閣曰皖匪竄踞富陽意圖東竄經副將貴廷芳

等督帶兵團水陸並進四面環攻該逆均向北門逃竄我軍斬關直入斃賊甚多當將富陽縣城克復辦理尙爲得手在事出力員弁兵練著准其俟富桐一律肅清彙案擇尤保奏署富陽縣知縣蔣貴斌著改爲革職留任典史張椿應得失守處分著免其置議

瑞昌王有齡又奏言上年十二月閒賊由太湖西山復竄長興境內當飭署長興縣知縣陳微

章督團迎擊連獲勝仗該逆占踞梅溪時至虹
星橋一帶窺伺復派守備楊通倫帶隊會同陳
微章等兩面夾攻先後擊斃賊匪一百四十餘
名騎馬賊目二名生擒二十九名訊明正法餘
逆逃遁我軍跟蹤追剿又殺斃六十餘名其宜
荆之賊駕用礮船至太湖一帶搶運糧食逼近
夾浦卽經夾浦縣丞余廷芬等各帶團勇前後

夾擊沈賊礮船數隻餘匪仍回宜荆現在長興
境內肅清惟西北西南兩面處處與皖南接壤
新城尙爲賊踞匪黨由皖南源源而來覬覦甯
紹完善地方沿江徧紮竹箴屢思偷渡於潛臨
安淳安分水桐廬富陽境內賊勢蔓延省城除
錢江一面外逆氛環徧萬難處處設防嘉興之
賊現以礮船百餘號竄至王店鎮窺伺海甯臣

聞

等惟有就現有兵力相機防剿奏入報

王有齡又奏言查太湖廣袤八百餘里襟帶蘇
常湖三府港口多至百餘處其地勢爲用兵者
所必爭自蘇常淪陷後沿湖地方已不能盡爲
我有然規復江東郡縣必以水師取道太湖聯
絡陸軍分投夾擊方操勝算臣自上年五月至

今無日不以進取嘉興蘇常爲念卽無日不以
保守太湖爲念當時蘇常各城雖爲賊踞而各
鄉忠義之士捐資團練築圩設卡固守待援者
尙不乏人太湖之洞庭東西兩山長洲之永昌
無錫之蕩口民心尤爲固結滿擬俟曾國藩駐
師廣德卽可會合進攻不意張玉良嘉興大營
潰退徽甯相繼失陷賊蹤蔓延浙境波及沿江

臣與曾國藩皆自顧不暇未能遠圖江蘇團練
日久難支以次被匪蹂躪惟洞庭東西兩山及
蕩口山巍然尙存上年十一月間逆匪兩次竄
擾西山角頭等處署太湖協副將王之敬由東
山帶船往剿臣飛飭湖防局道員趙景賢遴派
水師前赴應援該逆旋即退去王之敬樸誠勇
敢深得民心臣已欽遵

諭旨行文知照令其督辦太湖團防事務將御史薛春

黎陳奏各條體察情形督飭太湖廳妥籌酌辦
在防文武自遊擊同知以下悉聽節制並令查
汰冗員報明江蘇撫臣分別裁撤惟該副將所
統礮船僅祇八隻西山地方遼闊兼顧爲難浙
省內河水師甫經創設船數無多近因逆匪窺
伺甯紹屢次紮簿希圖東竄各項礮船均調赴

嚴州桐廬富陽一帶江面扼要堵禦急切未能
抽撥太湖網船祇能隨風行駛不能裁折自如
用作兵船難期得力其可以載礮駕駛靈便者
惟簡村陰山之民船尙爲合用而爲數寥寥半
已他出臣已囑王之敬雇覓二十號酌配礮位
每船募水勇十餘人合之該副將原部礮船八
隻俾資守禦該副將事繁責重不可無文員襄

聖恩飭催湖南巡撫速令赴浙至浙省各防餉銀積欠
培元一員仰懇
助臣已委主事周騰虎及在東西兩山辦理團
練之知縣沈偉田隨同商辦其處州鎮總兵劉

百餘萬兩倍形支絀奉撥湖南湖北廣東福建
四省協濟月餉及江西福建等省援兵餉銀並
懇

飭下各該省按月如數籌足同舊欠銀兩一併趕解來
浙以濟要需奏入

上命軍機大臣傳諭官文胡林翼勞崇光耆齡慶端瑞
璥翟誥毓科曰浙江防剿喫緊必須各省協餉按期
接濟著官文胡林翼勞崇光耆齡慶端瑞璥翟誥按
照每月協撥數目同舊欠銀兩迅速撥解江西福建
援兵餉銀並著慶端瑞璥翟誥按月如數解浙以濟

要需王有齡奏催處州鎮總兵劉培元赴浙著霍誥速飭該總兵趕緊前赴浙江交王有齡調遣

十八日丙子大學士湖廣總督官文奏言皖逆陳

玉城由廬州舒城等處上犯經我軍擊走後因楚軍全力謀皖省會空虛該逆勾結捻匪十數萬自霍山英山竄越楚境副將余際昌率所部三千餘人分投抵禦因衆寡不敵賊卽於初七

日竄入斬水該縣道路紛歧臣先調李續宜步
隊舒保馬隊迎頭截勦甫經拔營而賊蹤剽疾
初八日已竄黃郡現距省城僅二百餘里存城
馬隊百數十名營兵亦祇二千餘名不敷戰守
已咨商駱秉章暫將入川兵勇順流下駛馳援
鄂省一面飛調荊州襄陽滿漢官兵來省勦辦
日內援師未到卽就存城馬步官兵一半留守

省垣一半由臣親督扼駐省外要隘並帶水師
礮船嚴防江岸迎頭抵禦候調齊各路兵勇卽
可會同前敵上下夾攻奏入

上命軍機大臣傳諭官文胡林翼略秉章曰皖逆由英
霍竄擾黃州距省城僅二百餘里情形實爲緊迫官
文卽先就現有兵力分撥布置嚴密守禦並飛催李
續宜舒保馬步官兵迎頭截剿胡林翼現在太湖爲

桐城諸軍後路援應此時賊由英霍竄至黃州省城
兵力尙單自應先其所急著該撫迅卽派撥精兵協
同堵剿駱秉章計已行抵湖北著卽與官文會商如
省城布置周密卽統率所部馳赴蘄黃一帶會合湖
北各軍併力剿洗迅掃逆氛俟該省軍情稍鬆再行
帶兵赴蜀

上又命軍機大臣傳諭毛昶熙嚴樹森曰逆首陳玉城

勾結皖捻大股號稱十萬由霍山竄入蘄水徑撲黃
州去武昌省城僅二百餘里現已諭令駱秉章管帶
兵勇迅援武昌並諭令胡林翼派兵西上前後來擊
該逆飄忽異常儘被楚軍夾擊難保不折向北竄豫
省光固一帶與楚北蘄水羅田等處毗連著毛昶熙
嚴樹森速行籌撥兵勇聯絡鄉團扼守要隘嚴密布
置毋令賊蹤闖入豫境

同日翟誥奏言臣先後接准兩江督臣曾國藩
咨調副將李金暘同知魏喻義兩軍各帶所部
分赴江皖協剿均經轉飭遵照李金暘已帶勇
一千五百名於十二月二十八日起程前赴江
西至魏喻義一軍正在起程准廣西撫臣劉長
佑咨貴州獨山州逆匪已由南丹竄擾河池旋
據綏甯城步零陵等縣稟稱廣西逆匪竄至融

縣擾及長安墟復趨永甯之金竹坳揚言由楚
入江並據郴州及留防各營探得廣東連州逆
匪侯城帶一股復思蠢動偏近楚疆各等語是
西南兩路邊防同時喫緊堵禦不容稍疏除飭
道員江忠義督帶楚勇由永寶一帶嚴防西路
外惟南路防勇單薄不敷分布魏喻義籍隸桂
陽於永郴各屬團練均能聯絡已飭帶領所部

星夜馳往郴桂一帶擇要堵禦魏喻義暫難飭

赴江西又臣准浙江撫臣王有齡咨調湖南統

帶水師之處州鎮總兵劉培元赴浙差遣查楚

邊戒嚴上游水路空虛已移會該鎮統率舟師

馳赴衡永一帶相機防剿該鎮一時亦難赴浙

俟鄰氛稍靖再令總兵劉培元及同知魏喻義

分赴浙江江西聽候調遣奏入

上諭曰近已有旨飭催劉培元赴浙著察看情形若有
接替卽迅飭前往魏喻義著暫准留楚

二十一日 己卯 安徽巡撫李續宜奏言逆首陳玉

城糾合大股捻匪龔瞎子等直犯英霍查英霍
萬山叢雜下通潛太上達羅麻蘄黃實爲皖鄂
邊要有不得不同顧之勢胡林翼久病未痊未
能督隊前進現力疾堅守太湖副都統多隆阿

仍駐桐城掛車河扼懷桐援應之路臣於初六
日由青草壩率全軍而上視賊所向盡力追剿
皖江南岸現有督臣曾國藩督師祁門建德進
規徽池一路北岸則安慶爲江表咽喉應力圖
恢復以固根本奏入

上命軍機大臣傳諭官文胡林翼李續宜曰逆賊上犯
楚疆勢極剽疾胡林翼力守太湖因病未能督隊李

續宜自應先其所急力保根本官文現調荆襄滿漢官兵赴省又有駱秉章一軍及李續宜等所部馬步各隊兵力已厚前截後追此股逆匪諒不難悉數殲除省垣稍有疏虞惟官文是問若不能繞擊徒事尾追惟李續宜是問前諭官文胡林翼調兵二千名駐紮三河尖此時兵力如何仍著該大臣等酌量撥往以壯皖北聲勢

李續宜又奏言安徽九載兵燹全省糜爛吏事
餉事幾於無可措手臣來自田間驟膺疆寄籌
餉安民必資羣力非破格求才不足以資治理
而救危局查有湖北候補道邢高魁新放江西
贛州府遺缺知府陳濬內閣中書吳大廷兵部
主事李鴻裔湖北同知文希范湖北候補同知
直隸州知州鍾謙鈞候選同知孫謀湖南直隸

州知州張鳳翥湖北知州周開錫該員等品行
端方才識卓犖仰懇

天恩飭令邢高魁陳濬吳大廷李鴻裔文希范鍾謙鈞
孫謀張鳳翥周開錫等迅速來皖聽候差委以
收指臂之助又查有告病在籍之翰林院編修
郭嵩燾豫料事變其識量非近人所能及該員
係

內廷行走翰林非臣所敢擅請可否

飭發來皖出自

聖裁奏入

上諭內閣曰湖北候補道邢高魁江西贛州府遺缺知府陳濬內閣中書吳大廷兵部主事李鴻裔湖北同知文希范候補同知直隸州知州鍾謙鈞候選同知孫謀湖南直隸州知州張鳳翥湖北知州周開錫著

各該衙門及各省督撫飭令該員等前赴李續宜軍營聽候差遣委用在籍編修郭嵩燾並著湖南巡撫飭令該員前赴皖營交李續宜差委

同日慶端瑞瓚奏言據探汀郡逆匪欲由連城永安竄擾延平該處爲省垣屏蔽其所屬之將樂永安與汀州之歸化連城均係接壤隘口紛歧防不勝防已咨水師提臣蔡潤澤挑選得力

壯勇一千名又委守備黃大雄募雲霄壯勇六
百名並添調漳州兵四百名均歸蔡潤澤統帶
赴延擇要扼紮爲汀州後路策應至江西廣豐
被圍逆匪逼近河口浦城與崇安各關復形喫
重知府張啟煊一軍現已就近拔隊親往各關
防堵奏入報

二十二日

庚辰

河南巡撫嚴樹森奏言據報粵逆

陳玉城率衆竄至霍山在商城相近之毛坪等

處焚掠聲言欲竄湖北麻城臣以光商防勇鄉

團力難抵禦立即飛調遊擊王天保一軍迅赴

汝光相機截擊並飭候補道張曜會同南汝光

道趙書升督率嚴防以遏竄越

同日楊載福奏言自徽甯被陷南岸近江地面

時有賊蹤而黃湓鎮尤爲安慶對江近地正月
初四日探知賊偏湓鎮總兵黃翼升帶隊進剿
賊距該鎮數里遙擁而來黃翼升督勇抵禦斃
賊數十名旋有該地方紳耆帶同被擄之涇勇
江百勝自拔來歸黃翼升責令殺賊取信初五
日江百勝約同被擄之涇旌等縣難民在賊中
內應並約本地壯丁於是夜齊赴方村襲斬僞

參軍何有貴等賊目八名餘賊二十餘名並呈
繳刀矛旗幟一百餘件來投共二百餘人均經
黃翼升一體拊循給資分遣回籍賊目黃汝金
由鄱陽敗走下竄十三日分股在汪家渡地方
搭駕浮橋欲竄馬當都司郭明鼇率領親兵戰
於柯村該逆卻退其由朱家村出犯之賊經參
將彭楚漢督飭弁勇三面分攻殺賊四十餘名

十九日賊衆數千復分撲大通我軍水陸並攻
力戰多時斃匪二十餘名賊始潰遁查南岸彭
澤以下賊蹤肆擾節經我軍擊勦近江一帶民
困稍紓而逆首陳玉城大股已由官埠橋陸續
竄往桐城意殊叵測臣已飭令各營仍前扼守
庶免疏虞均奏入報

二十五日癸未江蘇巡撫薛煥奏言正月二十五

日探聞青浦嘉定二縣踞城逆匪在重圍鎮地方設卡滋擾該鎮防守員弁挑選壯勇乘賊未備直前衝殺斃守卡賊數名步賊數十名逆勢不支撤卡而遁臣當飭各營將領嚴密防範一面函商署提臣曾秉忠並飭參將李恆嵩等先將松江城外之營移紮廣富林要隘又咨催在

浙防勦之直隸大名鎮總兵馬德昭迅速帶兵
來蘇會合進勦馬德昭於正月下旬帶領親軍
小隊行抵松江二月初一日該逆大股徑撲廣
富林營盤經李恆嵩等督兵分路迎擊逆衆抵
死抗拒守備何發福等開放大礮轟斃賊目一
名及賊匪多人賊勢稍卻都司王玉林首先陷
陣各將弁一擁而進逆匪潰遁我軍乘勢追殺

斃賊數百人生擒長髮賊姚再庭一名訊明正
法其水陸竄匪計船百餘隻分路撲犯經曾秉
忠派留之長龍船奮勇擊退另有賊股竄撲埔
橋鎮北圖襲我營李恆嵩豫爲準備令防夜兵
勇放槍爲號我軍隨即出隊斃賊無數該逆旋
在附近放火初二日參將郭太平等隨馬德昭
到松尙未紮營立即分隊迎擊殲斃騎馬賊目

二名並騎賊十餘名該逆猶直撲營濠都司張
應選王玉林奮身越濠砍倒執旗賊目數人各
路將弁兵勇分投抄殺賊衆奔竄水路賊船復
經曾秉忠長龍師船擊斃多人不敢闌入嘉定
之賊同時由南翔竄至江橋華漕地方逼近眞
如北新涇等處經各路兵勇民團及由滬派往
之文武員弁迎頭截擊各有斬擒查該逆盤踞

上青嘉寶四縣交界之境實圖窺伺寶山上海
已飭該處防兵相機勦辦總期會合各營將東
竄逆匪聚而殲旃不令擾及完善署提標中營
參將李恆嵩布置得宜戰功較著可否懇

恩以副將升用先換頂戴其餘出力文武各員容臣查
明酌保以示鼓勵奏入

上諭內閣曰兵勇截勦青浦嘉定等處賊匪各有斬擒

勦辦尙屬出力參將李恆嵩著以副將升用先換頂戴其餘在事出力員弁著薛煥擇尤保奏

二十六日甲申瑞昌王有齡奏言富陽縣城雖經

克復而所轄沿江一帶逆氛尙熾並擾及桐廬地界其臨安新城二縣賊踞如前臣等仍令副將賁廷芳統帶水師分防江面副將楊金榜統帶陸軍專駐富陽爲水陸會戡攻取新城之計

臨安餘杭各鄉團練咸願隨同官軍往攻臨安
又由省抽調兵勇千餘名赴餘約會民團相機
進取維時張玉良已統兵由衢回嚴正擬分兵
掃蕩桐廬無如淳安之威坪梓桐源等處均有
賊匪竄擾並撲我港口營盤分水四鄉之賊又
於正月十八日闖入縣治探聞該逆欲攻嚴郡
牽掣防兵並竄省城以絕援應卽乘閒由桐江

而渡以窺紹興且約會徽郡之賊悉數來攻港口使嚴防之師首尾難以兼顧則隨在皆可竄越等情查浙省自上年以來地方大半糜爛惟甯紹尙稱完善該逆垂涎已久若不嚴防江岸固有偷渡之虞然非力復數城決無速去之志惟有責成水陸各軍防剿兼施以冀迅掃逆氛疊據貴廷芳楊金榜稟稱敗匪回竄富陽礮船

在陳文準唐家準等處接仗獲勝賊又竄往葛
村陸塢地方離富均數十里旋在六珠添造竹
篳意欲乘勢衝出駛赴南岸正月二十三日六
珠踞賊向黃山準竄來知縣何柄謙會同副將
貴廷芳親率礮船駛至六珠內港開礮轟擊立
將竹篳燒燬淹斃逆匪數名何柄謙直抵黃山
準槍礮齊施賊卽竄至陳文準復經礮船擊退

仍竄裏山一路二十七日楊金榜派馬步各隊

及守備布良帶等水勇進攻裏山賊巢先令都

司黃得勝帶領馬隊前進步隊伏於山凹賊果

出巢迎戰伏兵突出截斷後路黃得勝帶馬隊

回軍衝擊賊鋒大挫二十九日都司包文舉帶

同步隊由清明橋大路進攻適裏山之賊出竄

謝家村一帶當派傅宗勝等迎頭擊之包文舉

由鄱山抄襲賊後兩面夾擊賊始敗逃二月初
一日我軍乘勝會攻裏山賊巢燒燬外卡一座
賊衆死踣不出是日民團助剿亦有斬擒查我
軍雖屢獲勝仗足挫逆鋒然新城尙在負嵎臨
安無兵可分未能同時往剿而桐廬各鄉之賊
意圖偷渡祇此百數十號礮船分防二百里江
面難免疏虞况富陽餘杭兩處陸隊僅有三四

千人兼防嘉湖兩面未敢再有撒動現咨張玉
良貴廷芳等加意防範相機會剿一面飛催所
募湘楚各勇並所謂鎮道各員迅速來浙以圖
大舉

瑞昌王有齡又奏言浙省賊勢日增徽甯蘇嘉
之賊源源而來賊衆我寡時有顧此失彼之虞
并添募勁旅不足內固危疆外張撻伐查前任

陝安鎮總兵秦如虎前因傷病回籍聞已就痊
臣等已飛咨該總兵選募壯勇一二千名趕緊
管帶來浙並先後札飭已革徽甯池太廣道李
元度選募楚師五千人知縣張振新選募楚師
千餘人又咨處州鎮總兵劉培元在湖南選募
水師千餘人各自統帶前來以資調派奏入均
報

聞

二十八日

丙戌

王履謙奏言據探富陽新城臨安

三處逆賊伐竹作箠擄搶船隻意圖窺伺甯紹

蘇城賊匪現作張字大旗恐假扮官兵潛竄各

等情沿江防勇寥寥偷渡實爲可慮撫臣株守

省垣一籌莫展各處要隘又全無布置賊來則

蒼黃失措賊去則粉飾邀功積習相沿實不可

破臣焦灼萬分莫能名狀除請諭防勇民團實力守禦外請

旨迅飭疆臣通籌全局力圖進剿兼顧江防奏入

上命軍機大臣傳諭王有齡王履謙曰新城等處賊匪伐竹作籬擄搶船隻意圖窺伺甯紹昨據王有齡奏富陽克復後賊蹤分布新城分水一帶時思竄撲浙東雖經該撫撥派師船嚴防江面惟賊勢蔓延有增

無減而沿江二百餘里兵力無多設有疏虞大局將不可問王有齡統轄全省責無旁貸著嚴飭帶兵各員弁實力堵剿並隨時派兵前往協剿毋令賊蹤竄入完善地方王履謙幫辦團練亦有防剿之責著卽激勵民團會同官軍力固江防不可稍涉推諉

同日巴棟阿馮子材奏言據探金陵句容茅山各處增添賊營沔濠布卡蘇常之賊數千添集

句丹兩邑江北逆黨數千糾合句容屯賊約共
萬餘聲竄湖州又丹陽屯賊萬餘出踞新豐一
帶各等情揣其狡計知將兩路夾撲鎮城當飭
水路各營防備並飭小河口丹徒口等處嚴防
以杜北竄二月初八日句容逆股果由西南竄
來臣馮子材親督隊伍分扼京岷山岡見賊匪
千餘分占九華山一帶另有大股伏於山後乃

飭參將黃武賢遊擊謝讚等以輕騎突出其前
遊擊關松志等馳擊其尾均有斬擒該逆駭退
次日大股竄擁來撲後隊兵勇有先退者立斬
以徇賊知難犯退出山外我兵亦收隊回城其
另股逆匪旁竄小河口一帶水營副將鞠耀乾
督飭水師將賊擊退生擒僞指揮丞相二名十
三日該逆擁衆數千直撲鎮城我軍分隊兜剿

都司霍名升怒馬當先斬賊目李宏詳於陣復
有黃衣賊三人飛馬來救文龍德田慶和兩騎
橫出各斬賊目一名其一駭奔關松志追及斬
之賊遂向東而遁我軍整隊回城該逆現皆屯
聚鄉村距城二三十里難保不糾黨復攻臣仍
督飭各營嚴密籌防力圖埽蕩奏入報

欽定剿平粵匪方略卷二百六十一 辛酉年

三月初六日甲午官文胡林翼李續宜奏言准兩

江督臣曾國藩咨稱賊匪僞忠王李秀城由廣
信內犯圍攻建昌府城離南昌省城不遠必須
大支勁旅庶保江西完善之區擬移紮建德東
流抽出鮑超一軍先其所急又准函稱建昌援
兵屢次挫敗撫州亦被賊圍南昌省城震動各

等語臣思撫州距省甚近僅有左宗棠一軍勢

難堵禦如曾國藩抽撥鮑超一軍則邪門一路

又屬空虛設有疏虞所關匪細楚軍圍攻皖桐

正在喫緊又賊竄黃州李續宜舒保各統兵上

援更無別軍可援江西之急查湖南撫臣駱秉

章行抵荊州臣前以武昌告警商令赴鄂繼因

援師已集飛咨停止現聞蜀東一帶均就肅清

而江西正當緊迫似應移緩就急先援江西應
請

飭下駱秉章卽於荊州順流而下助剿楚北竄匪再分
軍從九江迅赴南昌會同兩江督臣江西撫臣
相機防剿或由駱秉章酌量分兵數千先行馳
赴重慶扼守俟江西賊勢平定再行入蜀辦理
奏八

上命軍機大臣傳諭略秉章曰逆匪上竄湖北復擾江西較四川情形更爲緊迫自應移緩就急督兵援應著略秉章迅由荊州順流而下助剿楚北竄匪再分軍由九江迅赴南昌會同曾國藩毓科等兵合力剿辦或酌量分兵數千先行馳赴重慶扼守俟江西賊勢平定卽行率師入蜀該撫務須斟酌妥善相機辦理

官文胡林翼李續宜又奏言武昌爲全楚根本
其形勢先重江防當調副將張啟基管帶大小
礮船一百十餘號分布武昌漢陽漢口陽邏團
風巴河樊口等處以扼江面一面咨行提督楊
載福道員彭玉麟派副將左光培成慶翔等管
帶水師礮船上駛應援彭玉麟復親督礮船於
要隘處所逐節布置以遏賊衆偷渡前因楚軍

急於謀皖防兵皆調赴下游省城存兵無多當
派副都統巴揚阿等就現存弁兵分要駐守臣
等親督司道周厯城垣日夜稽查無敢稍懈省
城東路以魯家港洪山爲最要西路以黃岡之
陽邏街埠漢陽之沙口爲最要北路以黃陂之
澠口黃岡之倉子埠爲最要現酌募勇丁配以
花凌阿馬隊令副將余際昌等分道駐紮前調

荊州旗營官兵一千名現已到省撥赴省城內
外駐防人心漸定惟該逆於黃州城外環築木
城土壘意圖負隅抗拒又分竄麻城羅田黃安
黃陂孝感等地方前經副將成大吉帶隊扼守
松子關連獲勝仗將大股賊匪擊退該逆又繞
至蘄水黃州乘虛分竄知府梁作楫一軍尙在
麻邑嬰城固守副都統舒保督帶馬隊自下游

馳回於上巴河渡江繞出黃州之上復由團風沙口等處至北岸會同黃州協副將書紳及黃州府縣文武督團截擊因兵力尙單不能窮追查此次賊匪與捻匪聯合人數衆多黃陂距省甚近臣續宜率十九營於二月二十一日繞至武昌同臣官文而籌機宜分路進剿迅掃黃州麻城羅田黃陂德安竄逆兼顧武漢根本隨時

聞

探明賊蹤虛實相機勦辦奏入報

初七日乙未曾國藩奏言據探該逆多聚上溪口

意欲撲犯祁門曾飭張運蘭攻勦上溪口一次
詎該逆見我軍退後復率大股在上溪口及河
村石田小當等處層層築壘與休甯屯溪之逆
互爲犄角力抗我師二月初九日卽添派總兵

朱品隆唐義訓參將葉光岳等會同張運蘭各率營弁進攻上溪口張運蘭揮衆迎擊刀矛並進施放噴筒火箭賊巢火起乃破重卡而入追至河干殺斃悍賊數名賊遂大潰時河村之賊復出萬餘過河迎敵經各營弁擊敗先將上溪口一帶賊壘燒燬該逆紛竄狂奔我軍追至石田復燬賊營六座賊向小當敗遁該處復有伏

賊接應從九品禹志連縣丞李公選帶隊趕至
將小當之賊全行擊敗沿途殺賊二千餘名生
擒僞領天豫僞將軍僞檢點等二十八名髮賊
八百四十餘名解散難民甚衆我軍乘勝直抵
休甯縣城十一日會齊各營四面環攻擊斃城
上悍賊多名同知朱聲隆等復帶隊猛撲被礮
傷者約四百餘名各營銳氣不爲少卻該逆見

我軍圍剿甚力連夜棄城遁走立將休甯縣城
收復查休甯之賊踞城將及半載賴上溪口一
戰連踏逆壘大挫兇鋒遂得一攻而克在事尤
爲出力各員謹先行開列懇

恩獎敘其餘出力員弁容臣擇尤彙奏請獎陣亡人員
俟查明後再行請卹奏入

上諭內閣曰官軍攻破上溪口等處賊巢克復休甯縣

城勦辦甚爲得手河南開歸陳許道張運蘭著交軍
機處記名遇有按察使缺出提奏記名總兵朱品隆
唐義訓均著遇有總兵缺出由軍機處提奏參將葉
光岳著免補各缺以副將仍留江蘇遇缺卽補同知
朱聲隆著賞換花翎縣丞李公選著以知縣不論雙
單月遇缺卽選並賞加同知銜從九品禹志漣著免
選本班以府經歷留於江蘇儘先補用並賞加五品

銜其餘出力員弁著曾國藩擇尤保奏陣亡人員並
著查明請卹

曾國藩又奏言據報建昌之賊開挖地道城中
兵不滿千危在呼吸援師敗挫賊蹤跟至撫州
等情查撫建去省甚近關緊要已調鮑超一
軍由九江一帶馳赴江西省城先顧根本此次援
撫建臣因休甯新克徽州可圖暫緩移營仍駐

聞

徽境惟鮑超之軍一動祁門西路建德一帶又將爲賊所踞左宗棠之軍小挫一次祁門南路浮梁一帶亦恐爲賊所阻臣惟有激勵將士力攻徽郡以通浙江之氣而開籌糧之路奏入報

初十日戊戌曾國藩奏言僞忠王李秀城股匪合

圍建昌府城晝夜環攻安肅道劉于溍派兵救

援正月二十七八九等日屢次開仗尙與城中
文報不通無論能否解圍而大股旣入內地則
或犯南昌省垣或犯瑞州臨江皆不可不豫爲
之防又皖北四眼狗陳玉城大股勾結捻匪四
路狂竄聞霍山官軍敗挫准撫臣胡林翼函商
臣處派兵救援北岸亦須有大支勁旅渡江援
剿庶安慶垂成之功不至中棄臣處兵力祇有

此數現在張運蘭一軍防剿徽州休甯之賊左
宗棠一軍防剿新犯婺源之賊此外別無勁旅
可作他處援兵萬不得已臣當移紮東流建德
防堵下游池州蕪湖各股抽出鮑超一軍作爲
游擊之師或馳援江西腹地或馳援皖北各路
視其尤急者而援應之或可少遏兇鋒奏入

上命軍機大臣傳諭曾國藩曰江西軍務喫緊該大臣

前奏飛調鮑超一軍由九江一帶馳赴現在逆匪上
竄湖北駱秉章能否分軍馳援江西尙未可定所有
鮑超一軍卽作爲游擊之師該大臣體察江西皖北
情形何路緊急卽爲何路援應至該大臣請移紮東
流建德兼顧皖北之處現在張運蘭一軍防剿徽州
休甯之賊是否足資抵禦著曾國藩悉心籌畫不致
顧此失彼方爲妥善

曾國藩又奏言逆賊黃汶金大股由建德入犯
江西連陷數縣經鮑超從洋塘跟蹤追至彭澤
之下泥坂左宗棠亦派楚軍四營由右路馳追
駐紮小麥鋪地方該逆勾結青陽銅陵援賊仍
踞建德縣城大股盤踞金家村黃麥鋪一帶意
圖抗拒正月二十六日鮑超商同總兵陳大富
列隊建德牽制城中之賊自率大隊馳至黃麥

鋪賊見官軍突至層層密排山谷皆滿鮑超派
霆左營副將鄭陽和等由左路攻擊霆前營副
將黃慶等由右路攻擊自率副將宋國永等從
中路進攻賊見我軍尙未成列遽來撲犯鮑超
督飭各營三路齊進賊陣稍動我軍乘勢下壓
追奔四十里該逆有撲港淹死者有懸巖跌斃
者屍橫徧野鮑超復令各營追至建德適陳大

富與水師會攻城賊克復縣城約共斃賊六千
餘人逃散者不下萬餘人生擒長髮老賊三百
餘名訊明正法江西饒九等屬一律肅清提督
銜綏靖鎮總兵鮑超勇冠三軍每戰必克額懇
天恩交軍機處記名遇有提督缺出請

旨簡放陣亡之守備唐有餘請交部從優議卹奏入

上諭內閣曰官軍攻破黃麥鋪賊匪克復建德縣城饒

九境內全數肅清勦辦甚屬得手提督銜湖南綏靖
鎮總兵鮑超著遇有提督缺出由軍機處提奏陣亡
之守備唐有餘著交部從優議卹

同日都興阿奏言查防勦鎮江揚州上下游紅
單拖罾等船均係由粵調撥來江近多損壞興
修旣無款可籌裁撤又不敷防勦惟有請

旨飭下兩廣督臣迅調廣東紅單拖罾等船四十號來

江以便將現存損壞船隻分別裁撤實於江防
大有裨益奏入

上命軍機大臣傳諭勞崇光曰據都興阿奏鎮江揚州
江面防剿船隻近多損壞不敷配駕自係實在情形
著勞崇光迅調紅單拖罾等船四十號派員星速管
解入江以便將現存損壞船隻分別裁撤

都興阿又奏言欽奉

諭旨江南徐州鎮總兵著詹啟綸補授卽赴新任等因

並據該總兵稟稱舊部忠勇四營共二千二十
名係由高唐連鎮收集隨從多年又所部新勇
四營共二千六十名係上年勦辦薛城良案內
收集歸伍均甚得力懇請一併帶往等情查揚
防得力兵勇僅有數千該總兵所部勇丁四千
有奇自城南三汊河以至瓜州分布三十餘里

聯絡水師直接鎮防鎮城有警亦可隨時渡江
助剿該總兵精明勇敢駕馭有方於南北兩岸
多資其力茲該鎮遵

旨赴任所部勇丁卽能強留而統率不得其人於軍情
殊有關係惟有據實直陳仰懇

聖恩俯念鎮揚防剿喫重准將詹啟綸暫留防所實於
南北兩岸均有裨益奏入

上諭內閣曰新授江南徐州鎮總兵詹啟綸著暫留揚州軍營以資防剿

都興阿又奏言准署江甯將軍巴棟阿總兵馮子材咨稱句容丹陽賊匪撲犯鎮江近城各處又丹徒金壇悍逆萬餘聲言卽日攻撲鎮城請撥兵勇渡江援剿等情查鎮揚肩齒相依當調遊擊林叢文譚金魁所部兵勇一千名又飭詹

啟給派勇一千名卽日拔隊渡江援應復令幫
辦軍務黃彬飛撥礮艇駛泊甘露寺一帶會同
防剿茲接巴棟阿來函知鎮城自接仗獲勝後
水陸協剿賊勢稍卻至天六髮逆前竄金溝大
儀等處經臣派撥官軍疊次擊退刻仍出沒無
常當此各路警急防範更宜嚴密連日分布各
營移紮要隘並飭下游水陸官軍嚴防偷渡以

聞

遇竄越奏入報

同日王有齡奏言查太湖地跨蘇常湖三府上年沿湖地方多已被賊蹂躪又屢窺東山並竄擾西山之角頭鎮等處經總兵王之敬奮力擊退惟該總兵所恃者祇有礮船八隻水勇一二百人臣早以爲慮於上年十一月卽請

飭下薛煥速撥京口礮艇六隻赴湖聽候王之敬調遣
迄今三月未見調到茲據趙景賢稟稱有管帶
水師之鄔懋烈來湖面稟正月二十八日探聞
賊船數十號進泊西山之角頭鎮二十九日續
到數十號是夜鼓柁而東王之敬督團齊出水
口嚴防一而分撥礮船堵禦東山前後詎賊繞
樸山前其時山後之船接應不及王之敬親督

礮船二隻與賊力戰彼衆我寡被賊圍裏水勇
受傷甚衆王之敬身被數傷不知下落賊已竄
擁登岸東山當卽失守鄔懋烈翻山覓渡來湖
求救等語查東西兩山旣盡爲賊踞該處距大
錢夾浦各口均不過百里一帆可達湖州豈能

苟安 臣甫經奉

命兼顧太湖正在與王之敬會商戰守機宜猝逢此變

愧憤徒增惟有招集太湖後山礮船六隻並催
上海礮艇八隻趕赴湖州統交趙景賢設法堵
剿奏入

上命軍機大臣傳諭薛煥曰據王有齡奏稱京口礮艇
奉旨業經三月尙未調到等語太湖地跨蘇常湖三
府蘇省豈容漠視現在東西兩山均爲賊踞湖州十
分喫緊所有該撫前奏調京口礮船六隻著薛煥卽

行如數調撥派委得力將弁管帶前往湖州以備防
緝

上諭內閣曰太湖廳營調兵籌餉事宜前經諭令王有
齡就近督辦茲據奏稱正月間賊船竄至太湖西山
之角頭鎮撲擾東山總兵王之敬迎勦力戰身被數
傷因衆寡不敵以致東山失守王有齡未能先事籌
防咎無可辭著交部議處仍著催調兵勇迅圖克復

毋任久踞並將王之敬下落查明具奏

十三日

辛丑

薛煥奏言上年十二月間准浙江撫

臣王有齡咨會奏請將京口礮艇六隻撥赴太

湖聽候總兵王之敬調遣臣當咨都興阿等迅

速派撥前往本年正月都興阿卽派白舨艇四

隻黃舨艇二隻飭令守備龔保康統帶駛入吳

淞口前赴太湖經臣疊次飭催該守備因整理

欽定四庫全書
卷一百一十一
七
礮械遲至二月初九日始行到滬實屬玩誤相
應請

旨將蘇松鎮標候補守備龔保康摘去頂戴以示薄懲
奏入

上諭內閣曰守備龔保康經薛煥派令統帶艇船前赴
太湖援剿延至月餘始到上海實屬玩誤龔保康著
摘去頂戴以示薄懲

十四日壬寅巴棟阿馮子材奏言查逆匪屯聚鎮

城鄉村雖經懲創並未遠颺距城僅二三十里
據獲賊供稱此次糾率賊黨四萬有奇尙有蘇
州逆目率黨兩萬餘人不日卽到等語是賊之
旣敗而不遽遁者安知非專候援賊併力來攻
以圖復逞嗣據探報西路塔山廟等處俱有賊
踞臣等卽調北岸兵勇二千名以資助剿二月

二十四至二十六等日協同鎮防馬步宮軍分
路迎擊該逆屢被我軍懲創相繼遁回句容伏
思該逆詭譎異常雖經遠遁更宜嚴防惟有督
同在事文武員弁實力巡查相機戰守不敢稍
涉疏懈奏入報

二十日戊申駱秉章奏言臣督帶楚勇九千餘名

由水路分起赴蜀二月十三日行抵安鄉接湖
廣督臣官文函稱皖逆上竄黃州省城空虛促
臣移軍赴鄂時臣所部前隊卽用道劉嶽昭知
府黃淳熙兩軍已先後行抵宜昌當檄該二軍
暫行駐紮籌酌進止及臣二十一日行次沙市
黃淳熙一軍業經督臣調回臣不得不暫駐沙
市審度機宜復接督臣函稱皖賊敗竄麻城鄂

垣布置周妥四川軍務喫緊仍囑臣督師西上
臣方籌換入川船隻決計進發二十七八兩日
疊准督臣函稱江西撫建被圍援兵屢挫湖北
賊勢擾及黃陂孝感雲夢德安等府縣欲臣分
兵數千駐紮重慶以一軍援江一軍援鄂已與
撫臣胡林翼安徽撫臣李續宜會銜具奏等語
伏念臣所部不滿萬人斷不能分援三處查兩

湖江西脣齒相依關繫東南大局不得不力圖
兼顧惟四川形勢陸通秦豫水達荆淮西北畿
疆之奠東南樵算之源胥恃乎此近五六年湖
北湖南餉源稍裕實收蜀省鹽釐之利比歲滇
匪擾亂鹽貨阻滯關卡無可抽收軍餉因之告
匱使臣督率所部入川又分援江鄂兵力實不
能兼顧而軍無見糧士不宿飽豈能責令枵腹

荷戈欲爲兩全之謀惟有撥其半以援江助振
湘軍之氣率其半以赴蜀疏通楚餉之源庶於
大局有濟現撥劉嶽昭一軍四千六百餘人前
往湖北協剿該道籍隸湖南與督臣曾國藩撫
臣胡林翼均屬同鄉或鄂或江皆可歸其調遣
臣仍督率黃瀛熙等營卽日赴川相機進剿極
知川省賊勢蔓延兵力單薄然使之會合蕭啟

江舊旅保全產鹽之地或猶力所能支但使保全川東鹽源無復阻滯卽於江鄂軍務實有神益將來布置稍定卽可添募勇丁大張撻伐萬一楚疆危迫仍可再圖援應奏入

上命軍機大臣傳諭官文胡林翼駱秉章曰四川軍務喫緊且爲楚省餉源駱秉章現分兩軍一援江西一赴四川所籌甚屬妥協著卽督率黃瀄熙等兵迅速

前進會合蕭啟江舊旅將川省逆匪認真勦辦勿令
再肆蔓延其劉嶽昭一軍著官文胡林翼酌度江鄂
情形相機調遣儻賊勢稍鬆仍飭令前往四川以厚
兵力至匪衆竄擾德安黃州等處現在曾否擊退並
著官文等隨時奏報以慰廑念

二十五日 癸丑 翟誥奏言石逆分股在江永等處

經我軍擊退竄往粵東連山境地復爲該處團

勇所截二月二十二三等日仍回竄泥村馬頭
鋪同知魏喻義等親率所部馳往迎勦殺長髮
賊十餘名賊退踞粵東之西嶺二十五日魏喻
義督勇追擊槍礮齊施賊勢不支紛紛敗潰二
十八日該逆冒雨偷竄宜章屬之李家村歐家
村等處同知楊安臣等分路截殺斃前鋒悍賊
數十名賊始退卻我軍乘勝追殺十餘里計陣

斬騎賊四百餘名步賊二千餘名生擒長髮賊
四十八名均於軍前正法魏喻義駐軍上江圩
偵知該逆將由牛市偷遁遂督勇疾馳攔截而
賊之前鋒已至見我軍扼要駐守復奔回太平
圩屯聚栗源堡二十九日魏喻義等率所部直
逼栗源堡適該逆齊向武陽司蟻附爭渡我軍
四路截擊溺斃甚多餘匪悉入堡死守時知府

聞

席寶田等踵至聲勢益壯三十日我軍乘勝攻
入徧諭投誠免死賊目僞統戎紀漳生等率衆
四千餘人棄械乞降收繳羸馬三百餘匹僞印
三十五顆僞照旗械無數其已渡武陽者魏喻
義派員協同投誠賊目紀漳生宣示德意招安
五千餘人楚境漸次肅清奏入報

二十六日甲寅薛煥奏言浙江之平湖乍浦毗連

金山縣治之洙涇及金山衛城而海鹽又與平湖乍浦接壤二月二十三日賊竄平湖且分股擾及新埭一帶臣卽飭參將梁安邦統帶兵勇馳赴乍浦金山交界之大營頭地方堵剿並函商會秉忠親督礮船兵勇由洙涇前往新埭剿擊賊見我軍水陸並進向中埭一路遁去會秉

忠直達平湖探知海鹽已於二十七日失守卽
派知縣洪士鏡等帶船五十餘號由平湖駛往
援剿二十九日會同浙師克復海鹽縣城不意
金陵逆匪數萬從常蘇而來麕聚嘉興嘉善又
於三月初八日竄入海鹽分犯乍浦前汀州鎮
總兵米興朝由平湖帶兵赴援乍浦已於初九
日失守副都統錫齡阿與米興朝均不知下落

賊卽進圍平湖曾秉忠仍派洪士鏡等往援並
於初十日親帶礮船赴大營頭張堰一帶扼要
駐紮旋據華亭金山等縣稟報平湖潰兵難民
紛紛到境知該縣於初九日已陷查金山距平
湖乍浦僅二三十里且與奉賢南匯川沙各廳
縣壤地相接當與曾秉忠酌撥勁旅扼守金山
並派員收集浙省潰兵協堵金山衛城一帶庶

可約會浙師迅圖克復奏入

上命軍機大臣傳諭瑞昌王有齡薛煥曰平湖乍浦偏近金山且與奉賢等廳縣壤地相接一經失陷則松江金山震動杭州省城北路亦形喫緊更恐窺伺浙東擾及完善地方薛煥現已與提督曾秉忠籌撥兵勇並收集浙省潰兵嚴扼金山要隘著卽督飭將士約會浙師夾攻平湖乍浦以圖克復並著瑞昌王有

齡迅機勁旅會合攻勦毋任久踞更須派兵進攻海鹽之賊以固浙東門戶錫齡阿米興朝並海鹽平湖乍浦文武各員下落著瑞昌等查明具奏

薛煥又奏言嘉定久爲賊踞寶山之羅店月浦等處時被竄擾參將姜德會商寶山縣知縣曹錫燾於二月三十月初十等日分路進勦均將該匪擊退第嘉定現添逆黨逾萬圖犯寶山

勢極緊迫臣已飛飭姜德會同參將李延舉等
整軍待戰相機進攻以保寶山而規嘉定奏入
報

二十八日辰丙瑞昌王有齡奏言大股賊匪八千

餘人山石門直撲海甯州北門已革副將張威
邦等開放大礮斃賊數十名落水死者甚衆該

逆折而東行我軍奮力抵禦張威邦等各派員
弁分出東北兩門抄賊後路將賊隊截爲兩段
該逆首尾不能相顧紛紛敗竄我軍追殺十餘
里斬獲長髮首級二百餘顆生擒賊目十餘名
餘逆向石門一帶遁去查該逆垂涎甯紹已非
一日海甯與紹郡隔江相望一葦可杭設有疏
失浙東完善之區必遭蹂躪該員弁會同堵剿

力卻兇鋒於大局關係匪淺可否擇尤保獎俾
資激勵之處出自

恩施奏入得

旨著准其擇尤酌保數人

同日翟誥奏言石逆分股由道州屬之蔣家嶺
竄至高明鋪屯踞二月初四日知府席寶田等
各帶所部及知州王必迪練勇分路進剿該逆

列隊抗拒適各路伏兵並出賊衆驚潰我軍跟蹤疾追斃殿後悍賊百餘名餘賊向永明大路竄走旋聞該逆前隊將趨白芒營市十五日道員江忠義與席寶田由中右兩路進副將周達武王永章由左路進賊見我軍大隊突至拌死抵禦各勇爭先陷陣賊知不敵奔過西河江忠義等兩面夾攻落水死者無數窮追至東塘又

聞

斃尾賊百餘名賊攀登勾掛嶺竄逸查由勾掛嶺外東可入廣東連州陽山亦可入湖南藍山臨武臣已飭魏喻義等嚴遏臨武要路令周達武等防守藍山並派劉培元督率師船由耒河上駛以扼旁竄之路奏入報

三十日

戊午

官文胡林翼李續宜奏言皖逆自踞

黃州後分黨數萬竄擾麻城黃安黃陂孝感雲
夢德安隨州等屬三月初一日臣續宜派道員
金國琛等率湘勇七千餘人進攻孝感彭玉麟
率都司王吉等帶師船駛入該縣城河舒保督
帶馬隊往來策應初三日王吉率礮船至城河
賊出大隊抗拒我師開放槍礮斃賊目一名衆
賊敗退各哨官直前奮擊燒賊船數十號斃賊

二三百人初九日水陸兵勇四面進攻將東西
賊壘踏平擒斬悍逆數十名賊衆慌亂我軍緣
城而入當將孝感縣城克復計斃賊匪四千餘
名生擒五百餘名臣官文前於雲夢應城被賊
竄擾卽調遊擊王允昌等馳往襄河湏口一帶
剿辦竄逆兼爲孝感各軍聲援嗣雲夢縣知縣
吉棟督團會同水陸兵勇於三月初七日將縣

城先自收復署應城縣知縣艾錕於逆匪闖入
縣城卽招集勁勇擊退賊未踞擾黃陂黃安之
賊經各該縣知縣督團攻剿擒斬多名二城均
卽收復其麻城縣城經知府梁作楫一軍督同
麻城縣知縣吳林固守三月初四日賊衆萬餘
由英霍繞路來撲參將劉中和奮勇出隊力戰
陣亡嗣梁作楫等調集兵勇內外夾攻殺賊三

百餘名敗賊潰竄立解城圍此次水陸各軍奮
力痛勦實足寒逆膽而快人心都司王吉可否
賞加勇號道員金國琛可否

賞加按察使銜此外出力文武員弁人等容臣等查明
擇尤酌保麻城陣亡之參將劉中和仰懇

飭部從優議卹以慰忠魂奏入

上諭內閣曰勦辦皖逆連獲勝仗克復孝感等屬及麻

城解圍勦辦尙屬得手都司王吉著賞給猛勇巴圖魯名號道員金國琛著賞加按察使銜在事出力員弁著官文等擇尤酌保陣亡參將劉中和著交部從優議卹

胡林翼又奏言臣於八年冬紮營黃州九年冬移營英山十年冬因懷甯桐城喫緊進紮太湖賊遂由英山竄陷黃州是臣銳意前路而疏於

後慮且皖楚邊防爲臣專責此次邊防失利腹
地空虛咎無可辭應請

旨將臣交部議處奏入

上諭內閣曰此次賊匪竄入黃州胡林翼駐紮太湖勢
難兼顧所有該撫自請議處之處著加恩寬免

同日瑞昌王有齡奏言據副將王振聲貴廷芳
稟稱富陽敗匪竄踞離富陽二十餘里之南隲

裏山實與新城爲犄角之勢王振聲卽令都司
陳鳳超等各派水陸兵勇明攻暗襲該匪驚亂
正月初八日王振聲卽親率各軍分兩路進先
將南鵬裏山賊卡十餘座踏毀隨卽進規新城
攻奪北門外賊營一座乘夜縱火賊匪驚逸官
軍伏兵齊起斬馘多名遂於初九日將新城縣
城克復是夜貴廷芳督同守備張國珍等各帶

礮船直擣六珠港賊營初十日逆匪大股出拒
知縣何柄謙等奮勇迎戰千總蕭有發中槍陣
亡適民團協助何柄謙等復擊斃賊目二名餘
賊相率敗走將六珠港賊營盡行燒燬並經桐
廬縣知縣徐代鎮率團擊退尖山竄賊富桐境
內一律肅清十二日貴廷芳派遊擊賀秉鈞等
率領團勇乘勝進攻分水縣城該逆竄出西北

兩門我軍攻入立克分水縣城先是遊擊楊玉
成等聞新城已復臨安之賊驚慌欲遁卽派隊
進剿行抵青山突與賊遇併力衝殺斃賊無算
賊從橫板溪逃竄遂將臨安縣城收復在事各
員均屬著有勞績合無仰懇

天恩分別獎勵陣亡千總蕭有發請

飭部從優議卹此外出力文武員弁兵勇團董容俟查

明再行請獎新城縣知縣張日新前署分水縣
知縣仲朝楨前署臨安縣知縣培善勸辦團練
隨同克復城池頗知愧奮可否免議失守處分
之處出自

鵠慈奏入

上諭內閣曰官軍剿除富陽桐廬賊匪並攻克新城等
縣在事出力員弁自應量予獎勵副將貴廷芳楊金

榜王振聲均著賞加總兵銜守備布良帶著以遊擊
補用陳鳳超包文舉劉加玉均著以都司儘先補用
陳鳳超包文舉並賞換花翎知縣何柄謙著開復革
職留任處分俟服闋後以同知用縣丞許之善著免
補本班仍留原省以知縣補用並賞加知州銜陣亡
千總蕭有發著交部從優議卹此外出力文武員弁
兵勇團董並著瑞昌王有齡查明保奏新城縣知縣

張日新前署分水縣知縣仲朝楨前署臨安縣知縣
培善勸辦團練隨同克復城池所有應得失守處分
均著改爲革職暫行留任

瑞昌王有齡又奏言據副將吳再升稟稱三月
十三日夜間嘉興大股逆匪水陸分途來撲石
門縣城吳再升等於十四日督隊迎擊北門之
賊斬獲首級十餘顆奪獲船一隻賊已敗退正

乘勝力追不意大礮裂開小槍不能得力該逆伺隙回犯愈聚愈衆四路包抄已從南門攻入吳再升身受矛傷不得已衝出重圍退紮臨平又據張威邦稟稱聞賊竄硤石袁化等處欲犯海甯十六日張威邦卽率都司丁文珍等帶隊迎擊手刃賊目數名砍獲長髮首級百餘顆燒燬賊船十餘隻該逆敗退我軍尾追十餘里均

向石門敗去各等語查吳再升素稱勇敢此次石門失陷雖因賊衆兵單所致究屬咎有難辭
應請

旨將副將吳再升暫行革職責令帶罪圖功以示懲儆
一面令其收集各軍迅速紮出長安一面飭副將文瑞等選派得力兵勇一千五百名馳赴長安一路會剿立圖克復至海甯爲省城門戶關

繫匪淺臣等已令張威邦等水陸堵剿並於各隘口實力巡防以遏狂氛奏入

上諭內閣曰逆匪自嘉興府來撲石門縣城副將吳再升等督隊迎剿賊匪愈聚愈聚官軍力不能支以致縣城失陷副將吳再升著暫行革職責令帶罪圖功以觀後效並著瑞昌等嚴飭吳再升等激勵將士迅圖克復其竄撲海甯之賊經副將張威邦等迎擊敗

退著卽飭令嚴行堵禦毋令竄近省垣

瑞昌王有齡又奏言據署遂安縣知縣陳燮稟稱二月十五日賊匪萬餘直撲城垣該縣督勇守禦忽有土匪內應逆衆乘閒爬城而入以致失陷等語臣等責令該縣集團助戰帶罪圖功一面咨催提督張玉良星速進兵張玉良由嚴州前進於二月二十三日行抵港口該逆分股

來撲官軍槍礮齊施將賊擊退追殺甚衆另股
逆匪由巖村竄至錫嶺副將況文榜指揮伏兵
截殺逆衆驚潰墜巖及殲斃者約四五百名餘
匪由五都六都逃去其竄壽昌之賊亦經官軍
擊退乘勝進攻鳳林港賊分三路來撲我兵水
陸並進用礮轟擊賊多應響而斃遂乘雨夜暗
襲鳳林港偪近程村縱火賊匪驚潰四散復被

伏軍截殺二百餘名生擒三十餘名當卽進攻
遂安槍斃黃衣賊目一名我兵緣梯登城手刃
守陴悍賊都司徐炳堃等沿街搜剿賊勢不支
遂向北門逃竄於二十五日將縣城克復共斃
賊一千餘名生擒一百八十三名東亭界首青
石等處踞賊亦經擊敗該逆退至板橋殺斃淹
斃尤衆餘匪逃至威坪遂安境內肅清查此次

在事員弁不出十日立克堅城勦辦極爲迅速
可否擇尤保獎以昭激勸至署遂安縣知縣陳
燮帶領民團隨同克復功過尙足相抵可否免
議失守處分恭候

聖裁奏入

上諭內閣曰此次帶兵大員未能豫行防範致賊竄陷
遂安雖卽督兵克復功過僅足相抵著毋庸奏請獎

勵其餘在事出力員弁均著瑞昌王有齡暫行存記
續有功績再行彙案保奏署遂安縣知縣陳燮失守
地方旋即帶團助戰克復縣城著改爲革職暫留署
任所請免議失守處分之處著不准行

王有齡又奏言查賊匪出沒於江浙皖南之間
以婺源爲咽喉要路誠能使曾國藩酌增勁旅
統以名將分駐婺城可固衢嚴廣信之防卽祁

門亦無包抄之患浙東江西道途無梗商販自
通得以抽釐濟餉兩省均有裨益儻婺源屹爲
重鎮江浙能酌量撤防更可節省防餉應請

飭下曾國藩妥籌辦理奏入

上命軍機大臣傳諭曾國藩曰婺源扼江浙皖南之要
若能厚集兵力屹爲重鎮可以固衢嚴廣信之防卽
祁門軍營亦可杜賊窺伺著曾國藩酌量情形調撥

得力兵勇前往婺源駐紮以爲江西浙江聲援

同日袁甲三奏言臣派山西蒲州協副將格洪額帶兵駐紮盱眙地方防剿一切頗合機宜詎兵丁方保輜因被責懷恨勾結蔣家集賊匪二三千人潛襲盱營格洪額登時遇害並偏脅弁兵擄去民船礮船多隻勢將下竄臣當卽派委參將朱起鴻等督隊夾攻奪回礮船五隻又經

守備徐平川等追剿約斃賊百餘名擊沈賊船五六隻餘船已多逃散疊經水陸兵勇四處搜捕地方一律肅清查格洪額此次激變有無別情容再查明具奏首犯方保輜聞已殲斃尙未尋獲屍身並聞有同謀設賊之把總李松山王玉鳳外委劉玉春亦尙未卜存亡此外文武員弁尙有數人未經回營均俟確查覈辦奏入

上諭內閣曰格洪額激變兵丁是否尙有別情首犯方保輜屍身未獲所稱殲斃有無捏飾其同謀投賊之把總李松山等三名並尙未回營之文武員弁下落均著袁甲三詳細查明毋稍含混